

續輯均州志卷之三

風土志敘

輶軒問俗殊異五方孝侯風土士女華陽惟我均  
陵風猶近古記紀歲時俗沿荆楚僻陋在夷瞑瞑  
躡躡樸以有立有無懋遷繫此瘠區財貨恒匱揆  
物土宜庸布其利於是稽歷代之民風核一邑之  
殊產刪厥繁縟分敘於篇志風土

風俗

漢魏六朝均州隸南陽南鄉順陽諸郡前史所載風

續輯均州志

卷之三 風俗

俗悉統漢南北言之司馬遷貨殖傳謂南陽西通武  
關鄖關俗雜好事業多賈尙任俠前漢書地理志謂  
楚有江漢川澤山林之饒江南地廣或火耕水耨民  
食魚稻以漁獵山伐爲業果蓏蠃蛤食物常足故齒  
窳偷生而亡積聚飲食還給不憂凍餓亦亡千金之  
家信巫鬼重淫祀陸愷宗海樓記謂桑麻蔽山人民  
樸野公庭無事地理志則稱士多好學敦尙禮義風  
土記謂民俗純樸安靜樂善方輿勝覽謂風物秀美  
魚稻之鄉歷攷諸書已得梗概其節序景物與宗懔

歲時記所載稍有異同舊俗相沿元旦禮神供大饅首取朱索繫松柏於門楣上元夕和粟麥蕎麩爲金銀鐵盞注以膏蘭蕪置家神前或按月爲盞十二閏月增其一系列釜甑蒸之驗盞中氣水之盈虛藉以知累月雨水之多寡頗有驗又然小蠟炬徧置屋角門隅謂之照虛耗清明節咸齋香楮載燔炙展奠先塋剪綵紙爲旂插隴首亦有團坐草茵間飽餽餘者三月三日城中士人往往攜酒榼登滄浪亭游眺流觴曲水猶餘前代風月望迎城隍神四鄉男婦頂禮焚香者雜沓雲集伏讀

續輯均州志

卷之三

風俗

二

世宗憲皇帝

聖諭廣訓禁男婦入廟燒香諄諄勸戒山陬下民囿於流俗倘月吉懸書進編氓宣德化亦無難丕變頽風也端陽相款以角黍與歲時記夏至節食糗少異中秋夜陳瓜果月餅酌月有乏嗣者親友擷小瓜盛盤中爆竹笙歌載而往置諸牀俗曰送秋秋成後村民率熙熙相約謁武當山建齋醮以答神庥真武爲境內福神揆諸有功則祀之義亦固其宜十月朔備物祭先墓與清明同至婚禮則先一月請期世

族皆行親迎禮間有以是爲繁文者廢置之然十不一二見也初喪族戚咸集各持炬赴城隍祠拜奠謂之報廟富家大族沿蹈者多雖讀書秉禮之士深識其非不爲苟同習俗已久亟切未能移易雍乾嘉道間俗尙儉樸搢紳每衣布素歲時召賓友設四筵其食蔬果魚肉從無以山海珍膳燕饗者會數而禮勤物薄而情厚固司馬文正公之所嘉也邇年日卽奢靡尋常士夫款客八珍倍列需費不貲一婦女之飾攢金翠規綺羅幾費中人十家產衣食華侈實長浮

薄願有識君子翕然深崇實黜華之思焉

土產

均地逼近中州物產多與他邑同繁富夥够不克殫述爰遴其稍異者類誌之穀則糯稻有魚子燕嘴柳條諸種火耕水耨與黏稻等釀爲酒殊芳冽蔬則猴頭菌以形名生古樹樵夫牧豎間採於苔痕斑剝間入饌芳味逾常羞葛花菜色赤脛大若芝菌秋霜浮空湧生地上厯厯如列星山筍暮春嘉品也甫穿地不盈尺雜葢供客清脍絕倫果則天師栗一名娑羅

子大如銀杏味甘美懸綴崖阿纍纍不絕無花果自爾成實剖食之色赤而味甘古刹中幾珍如如何樹矣木則榔梅出太和山榔本梅實杏形桃核相傳真武折梅枝插於榔樹偶結實因名騫林樹芽茁如陽羨茶能滌煩熱蓋羽衣道流所珍也萬壽籐堅多節刻鳩爲杖可以扶老李東陽所詠靈壽杖者卽此花則天花色紅而豔懸絲尺餘秋末遍山谷草則淡巴菰俗名菸其氣辛能禦瘴癘州南二十里產者尤佳下游商賈乘大舶懋遷泉貨流通多賴此近他邑種

益繁衍利亦漸微民間猶習種之千年艾小莖高尺許葉無尖椹面青背白秋深著黃花結實如青珠丹顆之類爲灸炷最良藥則藜蘆莖似蔥白青紫色高五六寸花肉紅色俗亦呼爲鹿蔥九仙子蔓生愛附物與蔦蘿同葉際茁枝或一或二裊裊下垂綻蒙茸花實如靈粟珠甚繁秋暮可擷禽則我師褐衣金距紅足碧爪每清秋於孤峯深林中嗚呼我師徹夜不止半部樂形類黃雀數十爲羣音如鼓瑟竹雞毛羽斑爛似鷓鴣而小善啼當林於露落蟬蛸風清滑滑

一聲喚破空山岑寂獸則羚羊似羆獬而大性便捷  
馳懸崖絕磴無顛墜夜則掛角以棲角堅勁擊金剛  
石應手立碎麝如小麋麝足身鬻虎豹文臍有香退  
則掩覆知其珍也鱗則鱖鯉大頭細鱗膚極白口旁  
有骨菱溪蓮塘多蓄之是皆畧異凡儔者故比物連  
類登於篇